



Inatsisartunut aalajangigassatut siunnersuut Naalakkersuisut peqquneqassasu inatsimmik pilersitseqqullugit, angajoqqaq/oqartussaassusermik tigummiartoq meeqqamut ataatsimik arlalinnilluunniit innarluuteqartumut imaluunniit arlalinnik innarluuteqartumut akissarsiatigut taarsiivigineqarnissamik, pineqartoq meeqqap innarluuteqanerata malitsigisaanik sivikinnerusumik suliguni. Tamanna pissaaq meerarisaq angerlarsimaffimmi najugaqartoq qassinilluunniit ukioqaraluarpat.

(Inatsisartunut ilaasortaqaq Anna Wangenheim, Demokraatit)

(Siullermeerneqarnera)

Qujanaq Demokraatit Inaatsisartunut ilaasortaataannut Anna Wangenheim siunnersuummut pitsaasumut isumatuumullu.

Inuuneq unamminartoqartuaannarpoq. Annerpaajugunarlutillu unamminartut, meeqqatsinnut attuumassuteqartut. Angajoqqaatut sapinngisarput tamaat iliuseqarniarsarisarpugut, meeqqagut pitsaasumik ingerlaqqullugit aammalu suna tamaat tikillugu ikiorniartarlugit. Tassungalu ilutigalugu aamma pingaartuuvoq uparuassallugu, angajoqqaat taakkuummata, namminneq meeqqaminnik aammalu taakku pisariaqartitaannik ilisimasaqarnerpaat.

Taamaattumik isumaqarpunga, una pitsaasorujussuullunilu tapersernartorujussuusoq siunnersuut parteeqatinnit Anna Wangenheim-imit saqqummiunneqartoq.

Siunnersuut angajoqqaanut, ullut tamaasa meeqqamik innarluuteqarnerannut atassuteqartumik unamminartorsiornerannut annertuumik pitsaasumillu allannguutaariaannaavoq.

Akissarsiatigut taarsiivigineqarnerup eqqunneqarnerani iluaqutaanerpaassaaq aningaasatigut oqilisaassisussaaamat, ilaqutariit angerlarsimaffimmi najugaqartunik meerallit innarluuteqartunik. Angajoqqaat oqartussaassusermillu tigummiartut amerlasuut aningaasatigut annertuumik unamminartorsiorput ilaannakumik imaluunniit suliunnaartariaqaraangamik qulakkeerumallugu, meeqqamik pisariaqartitaat isumaginiarlugit. Akissarsiatigut taarsiivigineqarnissamik neqerooruteqarnitsigut qulakkiissavarput, taakku ilaqutariit aalaakkaasumik isertitaqartuarnissaat, aningaasaqarnerminnik ernumassuteqarnerisa annikillisaatissaannik aningaasatigullu qularnaveeqquteqarnerulernissaannik.

Taakku saniatigut uannut pingaartuuvoq uparuassallugu, angajoqqaat innarluutilinnik meerallit suliffimminnik ilaqutariittullu inuunerminni unamminartumik oqimaaqatigiissitaariniakkajuttarmata. Meeqqap pisariaqartitaanut piumasaqaatinik paarinninnerup tamakkiisumik suliffimmik paarsinissaq ajornakusoortilersinnaavaa. Akissarsiatigut taarsiivigineqarnissamik neqerooruteqarnermi angajoqqaat ilaannakumik sulinissaminnut periarfissaqalissapput taamaaliormikkullu sulinertik ilaqutariittullu inuunertik tulluarnerusumik atorsinnaalerlugu.



Aammattaaq isumaqarpunga, uuma siunnersuutip ersarissumik takutikkaa, uagut Demokraatit tungaanniit pissutsit pitsaanerusut kissaatigigatsigit aammalu meeqqanut innarluutilinnut ilaquataasunullu periarfissat pitsaanerulernissaat kissaatigigipput. Siunnersuut tapertaasussaavoq inuiaqatigiinnut akuunerulersitsinermik pilersitsinermut, innuttaasut tamarmik sulinissaminnut periarfissinneqarlutik qanorluunniit ilaqutariit inissisimagaluarunik imaluunniit meeqqat immikkut pisariaqartitsigaluarpataluunniit.

Taamaattumik siunnersuut Anna Wangenheim-it alloriarneruvoq pingaarutilik naapertuilluarnerusumik akuunerulersitsisumillu inuiaqatigiinnik pilersitsinissamut aqqummi, ilaqutariit tamarmik iluaruullutik inuunissaminnut periarfissinneqarlutik sapinngisaminnillu taperseeqataanissaminnut.

Neriuppunga, siunnersuut maani Inatsisartuni amerlanerussuteqartunit taparserneqassasoq.

Taamatut oqaaseqarluna siunnersuutip akuerineqarnissaa innersuussutigaarput aamma Ilaqutariinnermut-aamma Peqqissutsimut ataatsimiititaliami suliareqqinnissaa innersuussutigalugu.